

STRONG BILONG OL MERI LIDA LO HAUSLAIN/PLES: OL STORI IKAM LONG OL LIDA BILONG LUMUSA INSAIT LONG PNG MERI FAMA BISNIS PROJEK

Stori bilong Rose



Rose i kamap long wapela femili we papa mama i save lotu long Baptist – papa bilong em pastor na mama bilong em wanpla lida long sios. Rose go skul inap long grade 9 tasol na lusim skul long wanem igat bikpla pait long ples. Mama bilong Rose save go pas long kainkain ol wok bilong sios igo inap em painim bikpela bagarap long kar eksident long sampela yia igo pinis. Nau em ino inap long wokim moa dispela ol wok bilong em. Olsem na taim ol meri long ples i askim Rose long kamap lida bilong ol, em save tingim na putim ol wok bilong mama bilong em olsem gutpla piksa na wok wantaim olgeta bel na tingting na kamap lidameri. Em ino bin kisim wapela liklik skul or trening long mekim ol dispela tu.

Rose i bin kam na bihainim dispela projek long yia igo pinis. Em kamap lida bilong ol meri long sait bilong hauslain tisa ol kolim long Village Community Educators (VCE). Wantaim bel amamas, em kisim dispela wok mak wantaim olgeta hevi bilong dispela wok; em tok dispela trening i helpim em na femili bilong em. 'Mi bai painim hat tru long kamap olsem lida sapos dispela trening ino bin kamap long mi. Dispela trening i senisim laip bilong mi na helpim tu long senisim laip bilong man bilong mi na femili bilong mipela, na nau mipela i save wok bung wantaim na pasin bilong pasim tok wantaim na wok bung wantaim i wok long kamap gutpela moa.

Long pastaim, Rose ino save sindaun wantaim man bilong em na toktok long ol gutpela rot bilong bungim na yusim mani. Tasol bihain long trening long wapela dei em igo long haus na askim man bilong em sapos em iken toktok wantaim em. Em laikim olsem tupela mas sindaun wantaim, bungim tingting na kamapim plen bilong bilong femili lo bihain taim – em laik autim tingting bilong em long wok bung wantaim, na laik tok klia gut long gutpela bilong wokim badjet. Man bilong em save pilai kas na dring bia, na save kaikai buai oltaim. Olsem na Rose ino save sapos man bilong em bai harim tok bilong em o bai senisim pasin bilong em. Rose i bihainim plen bilong em na sindaun toktok wantaim man bilong em. Rose nau i lukim ol senis ikamap, na ino long man bilong em tasol, em wok long lukim ol senis ikamap long femili tu. 'Man bilong mi nau i save go lotu wantaim mi na mitupela i bungim tingting wantaim long wokim bajet long ol mani samting bilong mitupela. Pastaim man bilong mi na mi yet ino save toktok long bajetim mani samting na man bilong mi oltaim save luk daun long mi, bilong wanem mi no skul-save meri, mi meri nating bilong ples. Em oltaim save tokim mi long go wok hat long gaden long painim mani na sapotim/helpim na painim kaikai bilong femili. Em save usim fotnait mani bilong em long painim wanem samting em yet i laikim. Tasol nau mitupela save sindaun wantaim long wokim plen na bajet. 'Dispela trening em trutru senisim femili bilong mi long wok bung wantaim long kamapim gutpela sindaun na hamamas insait long femili'.

THE PNG WOMEN FARMERS BUSINESS PROJECT

Rose tok, mak bilong em i sanap olsem lidameri nau i narakain na antap liklik, na femili bilong em yet i stap na soim wanpela gutpela piksa/kala insait long hauslain we ol narapela iken lukim na bihainim. Em tok, ol lain i lukim ol wanwan senis long femili bilong em na nau ol tu i wok long bihainim na senis kamap. Na dispela i givim em moa strong na amamas long wokim wok moa yet. 'Mi wanpela meri bilong sem stret, mi save isi tru long krai taim ol narapela ino mekim gut long mi, na mi ino save gat strong long sanap na mekim toktok long ol bikpela lain manmeri o long hauslain. Tasol nau, mi meri igo pas (lida) bilong 6pela hauslain (komyuniti) – taim mi singautim ol long kam, olgeta save kam, sampela bilong ol dispela lain i kam long ol femili igat biknem, tasol ol save kam daun long mak/level bilong mi na save harim tok bilong mi taim mi toktok. Mi save raun raun lukim olgeta lain insait long hauslain na mi lukim senis iwok long kamap long sampela femili. Mi gat klostu 500 memba (fama) na mi sapotim ol taim ol istap long hevi. Mi tu save givim mani taim ol nidim stret.

Rose tok, long taim ol narapela i lukim senis wok long kamap long femili bilong em, ol rispektim em moa, na ol komyuniti memba save bihainim ol tok skul bilong em. Dispela tu i givim em gutpela sans lo tokaut long ol pipol wanem em lainim insait long ol trening. Rose igo het yet long mekim ol gutpela stori bilong dispela trening na wanem samting em lainim insait long dispela trening. 'Dispela trening i helpim mi gut tru long daunim mi yet na long stap bel isi oltaim. Nau mi ino mekim wanem samting mi save mekim bipo. Bipo mi save laik long go tokpait na mekim nabaut long ol lain i mekim nogut long mi. Tasol nau, mi save sindaun isi tasol na harim na ino save bekim maus. Dispela sisenol kalenda em trutru helpim mi. Long taim bipo, mi save planim ol kainkain kaikai long wanpela gaden tasol, na ino save planim narapela gaden igo inap mi kamautim or kisim ol kaikai long dispela gaden. Tasol nau, mi save wokim plen long wanem kaikai mi bai planim na long wanem taim mi bai planim. Olsem na mipela save igat planti kaikai olgeta taim long dispela taim ikam. Nau mi luksave olsem dispela nupela wei long planim wanpela kain kaikai long wanpela gaden i kamapim planti pikinini kaikai mipela i kamautim/kisim. Na nau, mi gat laik long opim wanpela akaunt bilong mi yet we mi ken inap long yusim dispela save bilong benkim na lukautim mani trening mipela kisim'.

Rose nau i tingting strong long em i mas go aut na trenim ol meri long ol arapela hauslain. Em wantaim man bilong em tu i traim long lukautim na seivim mani long baim skul fi bilong ol pikinini bilong tupela, na tu plenim long wanem rot bai tupela i sapotim ol long bihain taim. Na nau em stap olsem lidameri, igat ol hat wok bilong em; Rose i laik long mekim kamap sampla senis long laip bilong ol yangpela meri insait long hausain bilong em. Rose tu i wok wantaim ol yangpela man na em save tru olsem dispela emi nambawan samting. Em laik givim planti time moa long ol yangpela lain na ol meri long bihain taim igo. Dispela em lidasip stori bilong em.

Rose em i wanpela bilong ol planti Hauslain Tisa (VCE) insait long PNG husait istap insait long dispela projek we ACIAR i givim moni na sapotim. Mipela i serim stori bilong em wantaim tok orait bilong em.

Go long <http://pngwomen.estem-uc.edu.au/> long painim aut moa long dispela projek.